

四庫全書

集部

欽定四庫全書

集部  
華泉集卷三

詳校官中書臣沈 颺

中書臣劉源溥覆勘

總校官庶吉士臣倉聖脉

校對官編修臣蕭九成

謄錄監生臣李 駟

欽定四庫全書

華泉集卷三

明 邊貢 撰

詩集

五言律詩

吳節婦

風雨屋蕭然孤燈四十年家聲越國後心事紀姬前行  
入先皇錄名垂太史篇溪清石不轉寒影照娟娟

送周判官

一官成晚歲，共惜子雲才。  
驅馬國門路，北風聲正哀。  
山形橫塞起，邊色映空來。  
感慨登臨處，殘陽照古臺。

送張進士孔昭赴南刑部

春風揚子渡江上，雪初消，草色連三月。  
山名記六朝，白雲官舍近紅日。  
帝鄉遙欲寄西來信，秦淮有落潮。

送鄭徵之還濟南

畫錦人爭羨，居官不離鄉。  
地親王子貴，衙對佛山長。  
珂

馬春情遠稱觴午夢香相思有南鴈瑤草寄新芳

送康狀元乃叔上舍生還武功

武功山路渺西去雪巉巖里布儒生服郵車使者銜上  
堂修典冊登隴拜松杉記取龍頭事鄉人問阿咸

闕題

久客便醒卧逢君一舉杯后山元苦節同父舊多才雨  
映三更燭春飄二月梅重來話相訪好記鳳凰臺

二

往往風雲下行歌大雅篇青春逢此地白髮感流年岸  
柳村村合江花處處妍到官多暇日一訪謝公泉

和張內翰見寄韻

爾向家山去休歌蜀道難乘車真得意戲綵足承歡劍  
閣留詩草亭溪把釣竿玉堂回首處夢繞五雲端

馮呂梁惠詩率爾酬贈兼謝藥草之惠

高情馮水部相見示新篇鐘磬懸清廟瓊瑤落九天色  
流湖岸荇香襲楚臯烟更謝金光草扶予衰病年

臨清舟中寄蘇三泉

水國逢君壽秋花蕩客船  
河流動顏色鄉土接風煙  
天地青尊外光陰素髮前  
吾愁隨日長叨祿漫多年

送曾世亨兵備赴蜀

九秋三峽道萬里一舟孤  
夜渡劍門月波光搖湛盧  
詩論青塚恨恩返綠林通  
歲晚東來使梅花肯寄無

夜中不寐登樓有懷

遠漏連疎柝山空夜寂寥  
地看鄉土隔書寄美人遙  
海

氣含春色江雲入斗杓  
灤源橋上柳應有拂闌條

送黃北川赴京

黃子黃門客青春上國行  
風塵遙入望邊塞獨闌情  
捧日雙龍闕看雲五鳳城  
懷中有短疏知欲請長纓

夜訪朱應辰

啓閣懸燈坐霜天夜轉幽  
居然剡溪興何異竹林遊  
水落江鴻去城孤海月流  
重逢好相憶紅蓼白門秋

寄弔松江周翁



不見南溪老蒼茫二十秋  
浦雲空北望江水自東流  
已化遼陽鶴猶疑海畔鷗  
存亡一掬淚何日灑林丘

解印後病中書懷二首留別南都諸同遊

勅放青山去恩同碧海深  
靜居諧始願孤往愬冥心  
已破槐南夢何須澤畔吟  
我鄉多水竹蒼翠想森森

二

一別齊川路兩年今始歸  
久知麋鹿侶遙待薜蘿衣  
洞古龍還在林深鳥不飛  
入山城市隔從此跡應稀

過呂梁

解纜洪流樹侵星過呂梁風雲猶帝里山水即吾鄉  
硯拂秋嵐濕衣沾曉露涼長年欣暑退伊軋棹歌長  
澤國新秋爽玄雲起北溟衣冠逢水部風雨謝山靈  
雅意堪留滯清詞足典刑夕舟兼曉榻談坐憶蒲汀

送王分司因過白塔寺飲

九日登高興三秋悵別情重携一尊酒此地共君傾  
塔湧浮雲暗山銜落日明還將紅樹色遙送海東行

登南明山

石磴抱雲迴，高高積翠開。  
蒼藤昏古殿，碧樹隱仙臺。  
鐘鼓三天下，風烟萬壑來。  
不知千載後，誰憶此銜杯。

二

地僻無人賞，靈山迥獨看。  
石梁橫險絕，巖洞倚高寒。  
靜已忘塵世，狂猶繫冗官。  
長歌送西日，野色上虛闌。

南都送道士

自君辭白下，靈悟入玄冥。  
始信虛無外，元來別有經。  
乾

坤寄水火離坎走雷霆兀兀眼前事真如江上萍

春雪

怪爾陽春日淒淒盡雪寒情知飛絮假還當落梅看向  
日偏縈戶隨風故繞闌同雲幕千里吟坐憶長安

分賦春雨得時字

為愛西堂雨黃昏坐不辭礎痕移榻處池漲捲簾時瑞  
紀農官頌題分水部詩客車何日返真長故山芝

九日

白日寒城暮，清秋畫角哀。  
地偏妨采菊，鄉遠怕登臺。  
鴻鴈天邊去，風雲塞上來。  
故交零落盡，卮酒向誰開。

次陳靜齋九日二首

山水留佳賞，登臨夙有期。  
却憐重九日，空讀汴臺詩。  
卧雨情無那，停雲思欲癡。  
夜深還秉燭，閒對菊花枝。

九日逢連雨，賓朋屢費邀。  
實孤黃菊盞，虛想綠雲簫。  
蟋蟀聲逾近，梧桐葉盡飄。  
喜聞歸不遠，旌節候來朝。

九日登吹臺次毛侍御韻

對酒重陽雨登樓萬里心異花開晚節羣木秀寒林鼓  
角連天暮風雲接塞陰王師捷何日傾耳北來音

春暮

骨肉俱零落還家不似歸自傷真塊處誰更遣花飛雨  
握春苗病風推旅鴈稀飄飄木蘭楫吾欲泛東沂

願病清源中秋罹雨宵分言霽短音寓懷

隔歲鄉關月中秋想一看真愁白髮顯翻隱碧雲端桂  
影流烟濕金波映浦寒雞鳴興不淺吟酌細凭闌

正月七日飲教水部分司歸即事

結舍臨江岸傳觴感歲華  
偶同人日酒翻滯使星槎  
水凍仍餘雪林寒且未花  
醉歸燒短燭高枕聽昏鴉

寶應元夕飲朱升之舍

望望平安驛春行路不遙  
故人還此地芳序且元宵  
水近潮通閣燈寒月過橋  
計程拚取醉佳賞更須招

供事長陵

俎豆薦春芳東陵晝漏長  
偃松盤古榭靈草秀虛堂  
日

月皇興遠江河聖歷昌因山昭儉德千載頌文皇

望陵二首

徙倚東峯下西陵望鬱然玄宮深閼日玉座迥浮烟風  
雨清明候乾坤正德年攀龍無處所空有淚潺湲

憶在先朝日曾沾侍從恩鸞輿歸寂寞鳳質儼生存夕  
日昏阡樹春風長澗繁祠官如可乞長奉泰陵園

過壽陵故址

景帝臨馭時  
自建尋毀之

玉體今何所遺墟夕靄凝寶衣銷野燐碧瓦蔓溝藤成



戾萌年謚恭仁葬後稱千秋同一毀不獨漢唐陵

西陵訪王給事汝溫不遇

時汝溫督工泰陵

狂夫多野性春到每思家却訪山中客還逢水際花薄  
雲陰古殿鳴鳥聚連沙迤邐還回谿晚西陵月正斜

遊玄福宮

福地盤青甸香臺倚紺雲材分龍藏寶功就羽林軍洞  
客脩丹籙山靈護敕文願資玄教力千載翊明君

泰陵供事述感五章

陵墓三年道重來七月期山河不改色霜露只增悲世  
想欽明德人傳顧命辭九齡如帝與端可致雍熙

恭己班虞舜求賢越武丁心猶在邊徼夢已隔泉扃永  
作千秋別虛傳七日醒夕廬齋沐所彷彿見遺形

象設徒虛備龍遊竟不還勲華留率土精爽寄空山石  
錮金泉黜雲棲碧殿閒寢園如種竹應有淚成斑

皇寢居庸近山深地轉饒雄關三鎮鎖幽府百靈朝堡  
堠烽全息屯兵甲半銷帝心遙可識終古絕天驕

午夜祠鐘發十官集廣墟遂者除禪服那復見宸裾長  
隧通玄壤明樓瞰紫虛松阡回望裏風雨泣連如

下陵二首

露行踰十里夜黑四巖陰不辨雲霞色惟聞鐘磬音  
鵝翻列火山鬼嘯空林欲下西陵路前溝水正深  
窈窕山逕僻喧喧徒御歸馬逢危石住燈入古林稀樹  
密全妨蓋雲寒半濕衣紅門知不遠秋角聽依微

望孝宗陵

泰陵今在目突起茂阡西宮殿青霄迥松杉白日淒坤  
墟符帝宅山壽與天齊忝稷明年祀重來路不迷

郊壇夜步

晚步凌高榭春空月正明星辰臨漢時樓觀俯秦京靜  
夜松飈響豐年穀日晴同心隔城市相望轉盈盈

候駕

遙聞葆吹聲仙仗下通明地轉蒼龍道天臨白玉京瑞  
光同遠近雲物半陰晴隱隱行宮啓重闕虎豹盈

承聞詔迎聖母太妃還宮

兆啓封邦日圖開繼統春  
漢南王化遠天下母儀新  
侍寢隨宮眷留行聚國人  
嗣皇敦孝理瞻望黼衣頻  
濟水朝京甸燕闐鎮海流  
九重迎聖母千里會諸侯  
日月開黃道河山列素秋  
禮文同扈蹕元不為宸遊

上陵

卧病長夏晚出門秋草生  
聊因上陵日一寄看山情  
野水侵平道寒雲覆古城  
聖君方用武羣盜敢縱橫

五月七日陪李劉二侍御遊宴尹亭

不到北湖久重來蓮葉青  
水香還落照山色自孤亭  
竹隱尚書榻窓懸柱史星  
回舟忽已晚波上月冥冥

沙河

放馬野田草路迴登古原  
雞鳴桑下屋牛卧雨中村  
薄日浮山影長橋下水痕  
煌煌中使出束帛向陵園

九月望日同大陽有臺二使君泛湖出郭二首

野眺隣幽曠移舟出水關  
上卿雙蓋迥漁父一蓑閒  
墜

葉紛飄座迴汀曲抱山芳尊對搖落不醉可須還  
候火射波光中流見女牆觀樓增突兀雲月遞微茫岸  
接青山近舟寧綠芷香興酣忘夜久歌吹遶林塘

村舍

村舍孤烟起山中朝雨寒丁夫荷鋤去稚子出門耆早  
稼登場圃秋瓜蔓井闌居然羨閒逸趨府欲辭官

泛湖

此日秋風起移舟向浦煙客心隨地遠人語隔花田古

寺踈林外孤亭落照前十年塵土夢回首一茫然

山行

兩山開一逕杳杳入雲煙仄磴樵人下危峰野衲禪斷  
鴻愁返照歸馬識斜川井邑干戈後凋零異昔年

御帳坪次王伯安韻

白日天門近青山御帳空亭虛從眺覽樹古自登封過  
鳥層雲上鳴泉萬壑中翠華春不返惆悵昔人蹤

題清樂亭



老木隱江亭幽居對錦城  
榻懸西嶺雪牆度浣溪鶯地  
僻人稀到心閒夢亦清  
窮通身外事何必問君平

重陽後三日登雨花臺

一片金陵月荒臺對酒看水雲  
霏冉冉江日隱團團鴈  
早那堪聽花遲未可食  
凭軒望鄉國西北近長安

與平厓林秀史泛湖北抵華不注山夜從陸歸  
二首

浮舟出近郭落日半溪陰  
水濶蒹葭淨山寒烟霧深  
壺

觴不盡興絲竹有餘音獨恨黃花少猶煩隔浦尋  
黃昏過別業却見舊山僧客駕聊云息鄉愁轉更增水  
光浮夜月林影散秋燈隔苑聞寒犬高軒醉懶乘

後三日登龍洞山二首

海嶠烟霞滿登臨愛積陰綠苔穿嶺滑黃葉綴巖深宛  
宛鹿麋徑泠泠泉澗音高人或住此精舍杳難尋  
寺古猶存佛山深少見僧遲徊意不極去住感偏增樹  
隱青林店龕明白石燈峭峰吾欲上未有鶴堪乘

宋駙馬園亭訪東石談子遇雨

却訪故人處遙來公主園  
濕雲蒸錦樹鳴雨過華軒檻  
近浮鷗接庭深乳雀喧  
將求卜居意相對已忘言

贈周文都

君乘別駕車南征千里餘  
予為燕市客歲杪意何如  
日隱川原暮江涵雲水虛  
新春見迴鴈知有秣陵書

寄華山人

山人歸薜蘿迢遞兩年過  
道遠情無那秋來興若何  
隰

霜收早稻江日曝寒簑不見雲中鵠空傳招隱歌

贈何子元二首

飲馬長城窟西風隴水鳴旌旗連朔氣笳吹咽邊聲鹿  
塞秋霜白龍沙漢月明共嗟班定遠身是一書生

萬里窮邊使三秋出井陘金鞍裝寶絡斑管代青萍吏  
識終軍貌人瞻博望星歸來市駿馬持節報明廷

行子

行子到京舍故人消息傳釣魚吹臺下築室黃河邊插

架餘千帙傾囊有一錢古來賢達者徃徃在林泉

彥卿垂示省署述懷之作次韻奉荅

寂寂荒園午庭虛不下簾墨池經雨潤厨火隔宵燭壁  
溜侵湘簾窓風動越繡灌花親汲水童子睡初甜  
官閒仍地僻賓從少經過睡起看山立詩成對竹哦小  
塘雲影亂深樹鳥聲多坐數秋期近雙星欲渡河

過雙泉寺馬文明別業懷寄

却過雙泉寺因懷馬舍人托交空有日為別動經旬古

澤蓼花亂高原禾黍新秋風吹獨馬望爾一傷神

山中懷白巖二首

珂馬長安道趨陪幾見秋那知遷轉地翻動別離愁光  
祿詩名遠容臺禮數優空山中夕夢長繞鳳凰樓

昔奉山陵使曾同虞殯吟鼇翻滄海變龍去鼎湖深紫  
極瞻雲地清霄望月心蒼蒼松柏裏懷往益沾襟

懷昌穀大理二首

孺子南州彥詞華早擅場共憐廷尉府祗益簿書忙寶

縱愁鸚鵡鹽車困驢驢何時一艇去與爾泛滄浪  
齋房隱薜蘿野外少人過向月復誰語看山空自歌城  
孤戍火亂地迥北風多惆悵離居夕相思奈爾何

白巖將赴北山供祀奉呈

賦客貪岩壑登臨思渺然出城看落日驅馬入秋烟  
綴陵門榮蘋香寢廟籩別來曾見說重補華山篇

張侍御過訪不值謝荅

有客騎驄馬徘徊戀友生虛煩過茅屋實已隔山城  
野

僻蓬蒿滿園荒蟋蟀鳴空村中夕夢相憶倍含情

雪後尹亭小集有懷張侍御仲齊

樽酒故相約燕遊翻不同亭深寒雪在橋斷夕煙通  
白日行歌裏青山別恨中夜闌車馬寂愁聽竹林風

尹亭夜集

憶共尚書飲蘭舟漾渚風芙蓉開月下簫管入雲中  
鶴唳煙沙遠螢流水閣通重來值搖落無復徃時同

晃晃水上月稜稜沙際風寒星動木杪遠火露煙中城



郭千峰對園林一水通興移還野酌留賞夜深同

將赴靈巖午憩黃山店示同遊諸子

感時愁不極出野興仍高墟野當紅藥園林過碧桃水  
行沙路軟雲卧石床牢更喜山翁朴忘形對爾曹

出黃山村遇霍子聞郡守章柳菴將至靈巖喜

而有作

路轉黃山店人逢霍茂才傳呼寺僧出五馬欲東來野  
水村村響岩芳樹樹開浪遊雙屐齒沾濕破蒼苔

由張夏村赴靳庄望同遊諸子

落日過張夏黃昏投靳庄嶺牛將犢下沙鶴避人翔石  
逕盤青靄柴門閉綠楊同遊忽不見孤眺轉蒼茫

靳庄山館即事次張侍御仲齊韻

野館千峯對登臨日載陽山川氣紆鬱天地色淒涼未  
卜三秋稼先傳二月蝗古村兵燹後搖落見空牆

出靳村望靈巖寺

福地靈山表來遊春已深情知百里道虛抱十年心野

樹猶含色鳴禽欲變音  
花宮瞻望處煙霧繞青岑

遲賢亭有懷白泉王子詔  
蓋與余同遊泰山而

余先王子歸也

樹杪遊雲白風前落絮輕  
行螭上壁篆闢雀墮簷楹客  
駕聊言息仙踪不可明  
懷人望東麓選選曙煙橫

春日卧病寄劉子希尹王子孟宣

我濟富山水人稱名士鄉  
兩生俱俊傑吾道豈荒涼  
紫禁煙花地青雲翰墨場  
應須得高步書札報滄浪

老病東山客青春意颺然祇因愁不去翻與醉相牽草  
檄懷公幹登樓憶仲宣幾時蓮葉裏重放北湖船

段村候成之僉憲

客子復迎客黃昏行古林短牆登吠犬列火動栖禽對  
雪三年夢維舟半夜心他時重相見佳話比山陰

東河內使粹夫

憶爾曾金馬予官亦瑣闥驚風一以振落羽遂分飛東  
郡身仍屈西河信每稀傳經與抗疏心事兩相違

移榻

卧榻便幽賞，虛廊接暝移。  
樹雲低繞棟，堦雨下通池。  
病間琴相得心勞，硯獨知商歌激流。  
楚惆悵北山期。

贈蕭醫士

覽鏡嘆華髮，出門鄉路遙。  
客裝侵暮雨，歸楫渡春潮。  
草綠河陰細，鶯啼苑外嬌。  
荷鋤行采藥，還似赤城樵。

贈方山鄭子二首

江東有狂士，結屋本深山。  
為客風塵外，馳聲梁楚間。  
才

聆捫虱語忽作釣鰲還予亦悠悠者相逢愧爾閒  
好酒恥儒素談兵靖塞塵深憐宋中客宛似晉時人到  
處不諧俗一生長任真因君感交態多少白頭新

贈伍文定太守移吉安

輦洛移官日荆襄過里年郡符分舊虎江樹聽新蟬河  
內人虛借關東政久傳行經五柳宅一為吊先賢

元旦

上日冥冥雨中宵且未休薄遊雙劍在羈宦一身留養

鶴憐初志屠龍悔壯謀著書聊假日元不坐窮愁

寄無錫管尹

吾愛管明府理民如昔賢靜者中浦月清飲慧山泉惠  
化表三異和聲流五絃春風阻攜手相憶思悠然

答松月伍中丞見寄

開閣俯江城懷人獨繫情碧雲空舊色黃鳥又新聲劍  
在終相合舟閒且自橫鳳凰臺上月孤負一春晴

舟泊清江有懷交遊諸公二首

未暖金陵席還趨玉陛行漢儀欣再覩虞秩愧惟清雨  
雪江南曲關山歲暮程臨分約歸候春服早須成

日射江流紫烟沙凍欲開鴈從梅蕊破春傍雪濤回北  
斗瞻星入東風應律催鵲鸞隔朝省不共上元杯

東朱柱史子宜

有美中臺彥聞名自國都豈知多難日識面在江湖地  
入王畿遠星分客棹孤霜威倘可借一為保前途

齋居同月岩夜坐



寂寂槐廳晚端居感歲時雪消山色在寒退井痕知白  
戰懷蘇老清齋伴子期坐來情轉逸華月照方池

賀承菴侍史省親還績溪

上疏天門北驅車海嶠東去留真自得心迹許誰同詩  
入杜陵室官追桓典風壽筵家慶好花對白頭翁

汶上寄王工部舜夫二首

真擬湖邊會言從汶上過歲時鳴鳥變岐路轉蓬多樹  
色連東嶽川流匯北河相思阻歡覲瞻望恨如何

幸不逢顏色真愁吐肺肝祇因哭子瘦豈是別家難雨  
麥虛省秀風梅實抱酸病懷魚逆旅誰與一盤桓

寄陳石峯中丞

一別梁園雨五看秋草疎君為烏府客我向白門居髮  
短風塵裏心長老病餘江流日東下何處覓雙魚

出郭將訪希準郡伯懼暮而返却寄

駕言江口出却至水西還遠道空回首重門欲上闕斷  
雲低白鴈斜日近青山欲採瑤華贈仙舟不可攀

和荅胡可泉郡伯

籍籍胡安慶新聲滿舊都詎知金馬客翻領玉麟符退  
食還經史登樓即畫圖昔賢憂樂地元只在江湖

溪翁

未覲溪翁面中宵夢已先關山非逆旅舟楫是登仙鴈  
語驚霜別鶯啼候谷遷烟波夕渺渺留恨滿江田

贈李都閩

好武將軍獨能文更愛君異勛江左策名閩隴西聞散

帙臨秋水投壺過夕曛長懷醉別處簫吹過溪雲

奉荅王載卿方伯

菊蕊南山屐荷華北渚船勝逢無節序佳句有雲烟列  
郡謳歌裏滄溟覽眺前故鄉誰地主回首憶當年

寫懷

欲逃中夏暑暫上上江船夜卧對松月曉行披水烟佳  
期渺天末良覲阻尊前相問各華髮遙悲青鏡年

再贈載卿

賓堂瞰水許沙柳繫行船裊裊綠蘿月冥冥芳浦烟鄉  
關百里外世事一尊前記取相逢地清河旅食年

戲贈張守公薦

蜀郡留工部任城卧謫仙古人多逆旅地主幾稱賢歲  
月青尊裏鄉關白鴈前知章與嚴武君不愧當年

近聞石翟子駐節河口喜而有贈二首

近聞臨駐處陌上草萋萋碧水春風外青山晚月西君  
車建高節旅舸繫平堤豈料漳河飲同聞絡緯啼

棲棘誠堪惜，崇遷且汙臺。不因盤錯試，誰辨鎔錙才。赤  
日昭天鑒，黃河殷地雷。凌秋泛槎去，知向斗邊回。

東王美卿萬戶

見說君家圃，新開夜合花。暝雲含洞石，炎雨淨溪沙。想  
像王郎劍，遲徊漢使槎。一尊虛舊約，惆悵坐昏鴉。

旅寓清源有懷故鄉親友

雨過雙松午，雲陰覆閣長。柳蜩迎日嘒，芹燕落泥香。碧  
水通官舍，青山接故鄉。懷人不可見，歸思轉蒼茫。

贈宋醫

施藥漳河口高齡髻未華地疑京北市人即宋清家石  
壁垂金草丹爐起玉花願傳玄牝訣交臂入青霞

雨中卧病谷來許以詩來問答之

爾本游揚侶吾慙程氏門遙憐雪盈尺何似雨翻盆久  
病拋書卷長齋閉酒尊草堂霞色晚好過一相論

重陽冷二守過訪留酌

九日逢知己開尊傍水涯壯懷餘白首幽賞有黃花日

隱郊臺暮雲連浦樹斜未須論去住乘興即為家

徐園夜坐有懷

避暑將軍府青青竹滿園坐看臺上月吟憶水西軒螢  
火流煙度蚊雷接暮喧美人漳浦卧何日奉清言

贈環峰王總戎西征

開府馳聲舊轅門授鉞頻日華承蓋轉江色映袍新去  
作鄖山雨來經蜀道春軍中人盡說籌策妙如神

荅羅兗州



我抱文園渴君淹曲阜城中年俱抱屈異地各懸情永  
夜孤蟾色新秋旅鴈聲况聞吳楚變漢帝且南征

寄胡文甫

不見胡文甫七回明月圓家林且如此宦海益堪憐碧  
柳秦臺馬紅蕖濟水船往來餘百里同醉是何年

午日卧病有懷張王二子

棲遲仍舊國愁病且端陽白髮能相妬清尊漫自香壁  
虛懸艾好溪迥入舟妨苦憶青驄客盈盈水一方

贈鄭少尹

我正雪中卧君從天上還  
節高元自苦才大可能閒  
淅瀝聽疎竹蒼茫對遠山  
夜深拚一醉休當剡溪灣

贈劉希容

籍籍劉京兆還家尚黑頭  
無心戀簪組有子紹箕裘  
月夜樓中坐花時郭外遊  
不堪相訪地醒眼話離愁

懷王生

世棄君平久狂疎老更添  
絕人吾豈好嗜酒子應嫌  
荷

葉翠出水榴花紅入簾晚當西牖坐山日映書籤

夜訪德宣不值

坡陀古堤上往來傷獨遊相違豈在遠一見已無由水宿厭棲泊暮行多慄憂瓊枝不可即腸斷衛川流

寄徐進甫

城東徐孺子不見已三年鴻鴈幾時至音書誰與傳釣魚寒澗曲注易古林邊遙想府中榻常因高士懸

過汴呈獻吉

兩年京郭居空望故人書五月梁園道來乘長史車川  
流赴海急隰日漾沙虛欲訪漁樵徑蓬蒿不可除

夜泊漢陽却望武昌有懷矩菴

對岸武昌郭清宵回望頻離心繫舟遠旅夢涉江新積  
水明疑晝浮烟靄似春樓空黃鸝杳延佇獨勞神

白泉王子居山相近

爾能耽野趣吾亦愛村居白屋情偏好蒼山畫不如桑  
麻通雪徑雞犬接烟墟歲晚青藜在相過且校書

同王白泉步過北村訪孫胡二子

少日同門客山居晚共依孤村一相訪深樹鳥聲稀而  
水心逾靜班荆願不違蒼蒼平野際還望瞑烟歸

谷子訪予別業

谷生憐我獨相訪到山家碧水孤村抱垂楊一逕斜野  
人共白酒稚子飯胡麻坐愛殘陽裏庭槐吐細花

懷三屏子

北郭雨冥冥東山雲霧青三屏不我對九柳自吾亭短

髮嗟同病長歌笑獨醒臨溪撫身世百載一浮萍

送都玄敬二首

才高憐晚達十載尚為郎書買黃金盡愁生白髮長夏  
曹分武庫秋殿別文昌木脫霜臯冷何人共采芳

驅馬別君處秋陰當暮生林柯無靜葉江鴈有歸聲綠  
水閭門道青山建業城未能同理楫延佇獨含情

送陸子引

世業機雲後聲光博望前使星連禹服卿月渺吳天岸

迥山回枕泥香燕拂船壯遊應不負隨處有詩篇

送唐仁夫

象闕指龍洲天南海北頭島夷隨使節山鬼避行舟  
墓采秋蘋奠鄉看書錦遊歸期定何日瑤草思悠悠

送施克和

樓敞壁燈懸歸心夜不眠袖中懷楚玉江口泛吳船  
興寄風人外名收國士前秋來消息好知向鹿鳴傳

送劉氏叔姪赴舉

雙馬飲溪流溪邊雨乍收方趨棘園戰不比竹林遊禮  
學傳三世家聲動九州太行山上月幾日桂花秋

送徐德章兼寄杭世卿吏部

迢遞延陵路新乘使者車國風收外史廟號布中書海  
色宵征裏薇花午夢餘相逢杭吏部歸楫問何如

送范掾尉仁和

入仕得親懽舟行且問安青山越州路黃綬漢時官暑  
服裁江練名花薦渚蘭六橋三塔景公暇幾回看



送劉博之叅政南陽二首

薊北才能會聲華早見收道高傳吏部詩好入隨州別  
宴當梅雨官程過麥秋江湖憂正切休上望京樓

津橋南渡頭落日片帆收冠蓋新方嶽河山古豫州樹  
深燕市晚雲冷爵臺秋兩地分千里懷人各倚樓

送黃端州

春水泛桃花飄飄海上槎官崇先領郡親老一還家石  
抱溪雲紫烟含嶺樹斜夜深登望處北斗是京華

送王秉衡歸省

津樹隱春艤林花集暮江天涯歸客遠堂上老親雙捧  
日心常切看雲夢未降聞來書諫草誰與坐山窓

送曹元孝監河之徐州二首

水部移舟楫臨津問所須離心漢宮柳幽夢楚垓燕鴈  
迥雲重覆花寒地一隅吟詩坐東閣誰與盞冰壺  
石閣延春望洪舫送酒湏斷蛇荒澤徙戲馬舊臺燕碧  
樹通江徼蒼烟接海隅三山不可見休更問蓬壺

再寄其子毅之

相尋空繾綣相別太斯須一去青門道幾回生綠蕪  
文章傳海內消息阻天隅歲晚登高憶勞歌缺唾壺

藏六軒夜別東卿

到寺鐘初寂高城夕漏遲閣雲昏冉冉庭雨凍絲絲  
留客燈前席懷人海上詩樹鴉啼不斷歲杪怨相離

贈周子庚使遼左

翩翩鳴玉珂千里渡遼河爾本詩書客寧聞鐃吹歌  
立

朝同汲黯出使比蕭何莫厭貂裘敝霜風塞上多

簡別華文光同年

朔野北風起沙蓬飛不休端居念行客明發動歸舟古  
堞鳴禽暮虛堂落木秋重來不相見離夢轉悠悠

送華文遠

早蟬鳴樹頭歸棹渡江秋孝子祠重建徵君傳已修淚  
痕雙苧袖身世一弓裘不學龍門客逢人說遠遊

送董汝淳太守之楚雄二首

詩人重出守萬里一朱幡苦節留三郡英聲振五言山  
深夜郎道花亂武陵源月下勞相憶清秋幾處猿

井鬼占星地滇雲問路時嶺暄秋瘴濕江遠暮帆遲竹  
鷺迎津吏羣裘拜島夷課耕還吊古應到孔明祠

別顧華玉同年四首

問訊金陵客南歸近有期馬行沾雨慢蟬響入秋遲水  
稻供慈膳江綃製壽帷閒居賦成後曾見幾人為

落日長干渡西風短棹過故人歸後少秋草望中多謝

墅荒碑碣吳宮閼綺羅趨庭休澣外臨眺意如何

官署依鄉土幽求滿素心窓臨逸少帖牆掛宓生琴種  
藥開春徑看雲坐晚林避名名轉出休愛碧山深

達人氛垢遠流品自應殊駿樞分天廡鸞巢托省梧葛  
洪勾漏尹阮籍步兵厨未識圖南志相逢說著書

送秦用中邑博得鹽字

殘溜滴崇簷離杯雨夜添儒官歸鄭老詩客去高蟾調  
發囊琴古光逆匣劒銛昔賢身未達多少在魚鹽

尚令尹之興寧

萬里惠州去旅情應獨傷暮雲牛嶺暗秋草鴈池荒古  
跡懷蘇老清吟和李綱遙憐蠻聚落從此識甘棠

贈別三首

相逢不忍別相送思悠悠風雨一宵話關山千里愁暮  
潮通極浦寒燕逐行舟短髮年年白重看是幾秋

早葉半辭林晚蟾初罷吟入秋鄉國夢垂老故人心道  
在寧須祿官清尚有琴城隅分手處惆悵水雲深

獨持文字印遙泛木蘭舟古驛尋京口寒城過石頭誦  
聲分館夜吟思捲簾秋欲問前朝迹青山是蔣州

送孫志同經畧居庸二首

寶劔青驄馬秋高出塞行田公新受律武子舊傳兵鼓  
角邊雲慘旌旗海日明穹廬莫南徙中國有長城  
馬出燕關道人如定遠侯眼空沙漠氣心繫廟堂憂絕  
塞蒼烟暮荒山白草秋軍都城下過懷古一登樓

送朱文表



關河積雨晴千里一舟行庾廩司農計山川故國情古  
碑尋盼子芳草識聊城想見登臨處遙心覽八瀛

送楊生

相見十年外相尋千里餘青衿子老大白髮我何如涕  
淚丘園草風塵故舊書別情那可憶雲月曉窻虛

送王載卿

萬里雲霄使三秋澤國船冰霜消嶺瘴旌蓋麗江烟國  
賦徵求裏民風奏記前獨憐詩社冷一別又經年

送李僉憲維之北上

桓典乘驄日相如卧病春傷心一盃酒回首十年人雪  
暗關山色風飄驛路塵郭西慵出餞愁見柳條新


送王君寵主潼津驛

潼津佳勝地驛舍近潼關立馬看河水開窓對華山客  
懷登覽際官守送迎間倘見三秦友傳予髯已斑

送劉文振宰驛華山兼寄汝公太守

我抱遊秦志君今先我行一杯同出廓千里獨含情雨

入新豐晚雲移少華晴寄言桑郡守天子近知名



華泉集卷三

欽定四庫全書

集部  
華泉集卷四

詳校官中書<sub>臣</sub>沈 錕

中書<sub>臣</sub>劉源溥覆勘

總校官庶吉士<sub>臣</sub>倉聖脉

校對官編修<sub>臣</sub>蕭九成

謄錄監生<sub>臣</sub>李 駟



欽定四庫全書

華泉集卷四

明 邊貢 撰

詩集

五言律詩

送李司務思善二首

可怪皇華使相逢九日過地偏秋鴈少天迥莫雲多北  
渚青簾舫南山白玉珂未能同一醉離別思如何

蘇門形勝地往歲憶經過書院青山近仙潭赤鯉多月  
中攀古樹雪裏並遊珂六載重携手清尊奈爾何

送殷近夫謝病歸壽張二首

論交方恨晚為別更匆匆風雨深期阻山川幽恨同杏  
田溜水北草閣汶陽東鄉路元相近清宵有夢通

並居城下陌經歲往來疎薄宦惟多病窮愁有著書春  
山懷紫蕨夕浦悵紅蕖去去仙蹤渺何人伴索居

送徐德章乃翁



春看燕市花秋返晉陵槎  
水樹侵沙濶江雲隱驛斜  
夢依南國近書寄北關賒  
坐惜薇郎苦遙心附海霞

送于時宜

行子對新月臨堂酣且歌  
客衣寒未減鄉夢日應多  
魯甸封春草淮川渺夕波  
芳音托回鴈迢遞柰情何

留別王生

天際陰風起浮雲似馬行  
飛揚亦何意離別祇關情  
古岸垂楊合長河暮色清  
何時盡舸背樽酒說平生

送王演之二首

送遠臨河涘，蒼蒼夕景微。  
雲山望不極，書札到應稀。  
磧暗風沙起，春長旅鴈歸。  
秦關百二阻，何處換征衣。  
驅車度宛洛，歸路及春深。  
杳杳還家夢，悠悠去國心。  
青山臨古渡，白日下豐林。  
憔悴逢漁父，應為澤畔吟。

送矩菴中丞

荆楚連年旱，今冬雨雪頻。  
膏融厚土徹，綠迸早禾新。  
烽火千山息，謳歌萬室春。  
中丞調燮手，爭道捷如神。

別伯玉

君行不相見，卧病對春風。  
世事浮沉外，交親感慨中。  
古臺燕郭暮，流水晉祠空。  
他日歌招隱，青山有桂叢。

送友

十里黃岡道，萋萋露草繁。  
青驪將客子，白日過鄉園。  
水國春先到，雲程鳳獨騫。  
行者魯儒化，流澤被元元。

贈別甯子

風度與桓典，勲勞更伏波。  
明珠騰謗巧，驄馬避人多。  
白

日就長道清秋凌大河非關燕趙別相送一悲歌

送劉希尹入高邑省親

朝夕夢親顏驅車西出關青雲深魏闕白日照恒山麥  
秀城池古人居井邑聞秋風扇枕暇璧水遲君還

送伯川子歸吳二首

東門嘶馬去幽志幾人同問寢歸吳苑含香別漢宮關  
山雙寶缺江海一秋蓬欲覓南州信時看西北風

舊國江村外清川繞舍流空聞賦招隱不得泛同舟雨

暗膠山寺花明愛日樓遙憐相憶處落葉蘄門秋

送陶良伯使魯府

天馬玉花驄騎來天廐中言經汶陽道却過魯王宮岱  
嶽浮雲外蓬萊碧海東飄飄鸞鶴侶仙駕與誰同

送楊純夫

天府通新籍毘陵返故居三春辭北闕幾日過南徐岸  
柳陰陰接汀花冉冉踈江流日東下何處覓雙魚

送趙體仁侍御改官

問子今何適時危路且艱豺狼潛未及驄馬去難攀  
野雲藏日秋林水接灣病夫門不出心度萬重山

七夕夜雨送父回家感而有作

感懷逢七夕況是別翁時天上夫妻會人間父子離  
夢疑青鳥下心逐白雲馳幾陣芭蕉雨蕭然髻欲絲

送張仲齊侍御還京二首

上國埋輪後東山攬轡初世方驚多角吾已識龍顧  
古栢凌蒼漢清水照玉壺千秋桓典駕驅逐有人無

繡斧明霜日川原指顧中才真堪作兩名不愧觀風狡  
兔移山窟玄狐隱棘叢城隅一片石他日比羊公

送張廣漢中丞觀軍留都二首

聞說狼山下江波帶血流中原初息戰諸將各封侯草  
綠西興渡雲生北固樓經過弔陳迹春日暫停舟

二月金陵道中丞擁節還日光搖組甲春色映江關國  
壯軍容整時平武畧閒坐看龍虎氣長繞鳳凰山

送陳國克內弟赴京師卒業

千里携書劍觀光入上京外親無我厚宅相有君成細  
雨官河暗垂楊客路平承家仲氏在休戀倚門情

送韓石泉赴德州兌運

細雨空城暮游雲散薄陰落夜春晚色芳草病餘心夢  
接官曹近秋生國計深林中與水次誰伴獨行吟

留別柴子

相憶恨長道相逢驚白頭又為千里別還作幾年愁故  
舊天涯少勛名世上浮不堪風雨夜虛館對新秋



留別張西盤大叅二首

苦戀三秋別還為十日留江湖宋玉感風雨杜陵愁墜  
葉鳴沙岸寒雲抱驛樓河梁阻攜手誰與賦同舟  
滿酌豈辭醉未行先憶君山城稀見菊闌樹不開雲地  
入河源渺天連塞日曛那堪北來鴈偏向別時聞

贈張生下第還金齒三章

逆旅嗟同病相逢罷舉杯別期驚歲月壯志感風雷路  
險三湘隔心遙一鴈催可憐蘇季子還着敝裘回

北風吹獨騎萬里向西南沅水三秋雨偏橋十月嵐蘚  
碑懷蜀相花筆夢江淹好把山中屋重題捫蝨庵

聞道棲遲地苔香澗戶幽嶺猿相旦暮山月自春秋詩  
畫稱三絕圖書富九流祇應嵇阮輩與爾得同游

送王子兵備江西二首

舊隱辭函谷新章出漢闡碧山留豈得芳草怨相違簡  
拔皇心注升沉士論歸傳聞拜恩日猶著賞功衣

盖拂匡廬過帆飛蠡澤深三秋持斧日萬里渡江心虎

豹潛移窟牛羊廣出林祇應臺栢下端坐聽鳴禽

送翟給事廷獻冊封周世子還朝兼赴昌邑省

覬三首

冊命臨中土恩華接上台雪明朱閣麗風引翠簾開漢  
使鳴環入王孫露冕來星槎曙媚媚欣傍早春迴

登高逢歲晚把酒悵多違塔日霜逾靜巖花雪且肥家  
從東海過天向北辰歸可道親心悅宮袍是舞衣

諫客劉栖楚詞人陸務觀舌存應不慮盟在可須寒賦

頌名天下封章草夜闌稿成須寄我歸向魯門看

送楊希顏省墓還聞喜兼柬秦長史

劍裝喧鼓吹春日過鄉閭夢繞松楸遠心傷雨露餘里  
門妨躍馬宮錦煥飛魚若見秦淮海應傳寄別書

送楊文紳司訓玉田

東郭漁陽路南風幾日程客羶春草色僧寺晚鐘聲山  
認盤龍狀州傳種玉名關西舊衣鉢留取付諸生

送王景暘長史還周府

駟馬薰風裏中州路不賒雨深梁苑竹春老汴宮花親  
榻分羹美玉筵設醴嘉五雲迴首地不似賈長沙

送楊伯玉子南歸

孤舟風雨涼江客下江鄉歲月吟邊晚烟霞夢裏長釣  
溪開蘚石書架拂芸香霜落南垓冷何人共采芳

送周司業祭掃還臨海二首

客夢驚霜露鄉程入渺冥地連霞嶠赤天接海門青澗  
藻克新鼎碑苔蝕舊銘秋墟滿狐兔何處築思亭

赤闌橋上路千載一青衫家說編修里人驚樂正銜聽  
泉過萬竹看月步雙岩寂寞成均地春風早掛帆

送匡敬夫按貴州

歲晚神京別何時到鬼方雪迷山驛冷雲接海關長去  
住新驄馬封題舊皂囊遙懷征戰地幾處有耕桑

送趙叔鳴監稅德州二首

蕭蕭征馬嘶送客過前溪故里別來久家書空復題青  
山扁津道平楚衛河堤它夜幽尋處應知夢不迷

東赴海陵倉移家別帝鄉  
政繁輸轉地官古度支郎  
問寢椿庭近迴舟  
蓼岸香秋來客愁少  
風景似維揚

送董舅氏

暑雨曉初晴  
山泉落澗清  
一杯燕市酒  
千載渭陽情  
隴月牽遙夢  
江花伴獨行  
亂蟬無意緒  
爭向別時鳴

東阿留別無涯孟子

逆旅相逢地  
春殘花事稀  
同憐在遠道  
且復換征衣  
碧草連村暗  
青山四郭圍  
欲旋歸去馬  
還逐使君歸

送鄭雪齋秋官歸閩中

識面沉憂裏重逢旅病間  
應緣著書癖且作泛舟還  
雨色含青柳江流繞碧山  
東門一尊酒咫尺香難攀

送客

怪爾湖南使風江晚繫舟  
遙經十載別剛得寸時留  
素月明寒浦蒼山隱暮流  
水鷗嗟未及雙泛寡離憂

趙麗卿易史座留別限韻

聽雨罷彈碁蒼茫生遠思  
遙應白門柳飄蕩綠烟絲  
旅



跡江花笑歸心海燕知倚酣方戀別休誦渭城詩

別周子賢僉憲

身是外臺佐心蟠中秘書杜陵元自許桓典或能如夢  
結三湘外神交十載餘同舟忽判袂愁絕廣川墟

送吳學正之留都武學

振鐸敷文教遷階得武庠講筵環胄子官舍接宮牆樹  
隱臺城古江連石埭長相期共臨眺嘉侯及重陽

送別菊泉胡子

寒聲下木杪送子一酸辛白日川原淨高秋鼓角振來  
看南苑雪歸憶上都春懶聽陽烏發嗷嗷青石闌

廣川舟中與東橋酌別次韻三首

汴上一為別漂搖十二秋那期衛川溪得並李膺舟月  
映青山出波涵碧樹流接宵歡達曙不為酒尊留

共脫風前帽還披月下襟乾坤萬里別江海十年心越  
鳥枝難共湘魚帛易沉相逢畏相失延滯綠溪陰

愧我蒹葭質倚君瓊樹姿遙憐共飄泊且復笑栖遲秀

句推先達高言戒獨危江籬照雪月秋谷有深期

卧疾柬別孫性甫二首

杳杳關河客盈盈一水間那因各抱病遂阻共開顏  
雨入青簾細雲移碧樹閒含情送遙矚時見暝鴉還

舊典司番禮新乘郡守車問名俱不忝遷秩定何如  
父老看行蓋君王想諫書徵黃會有詔早晚下宸居

張秋官元德席上留別

春日江陵去烟花萬里途山川留故郢舟楫帶三吳樹

影湘流轉猿聲峽月孤郡樓登望夕天北是皇都

送曾世亭兵備赴蜀

聞道霜臺使親承岳牧恩山川增氣色草木藉生存拂  
暑辭東郡先秋過楚門江皋有芳杜作意待王孫

鸚鵡

珍鳥來清夏芙蓉避綠衣苦遭鴉並嚇羞與燕同飛整  
翻身仍阻能言意且違何當即開鎖放爾隴山歸

東塢為李戶部貢卿賦

舊塢濃花發新春旅夢懸醉吟朝雨後醒坐夕陽前摩

詰才堪比

右丞輞川  
有辛夷塢

隨州句可憐

劉長卿有花塢  
夕陽遲之句

山禽

傍精舍來往正翩翩

### 雪菴

大雪乾坤閉開窓且靜觀偶然同邵子不是學袁安數  
在梅花得春從太極看憑將畫前易一問灞橋鞍

### 昌平館

寒食煙花暮傷歸復旅遊芳尊不相對華館坐悠悠月

細光疑晦山空響似秋老親垂短髮計日向西州

公館即事呈彥卿

赤日下庭角白雲生晝陰彌因吏喧屏轉覺道情深樹  
陰依鄰借蟲聲隔水尋迴駭淹薄暝相遲在同心

李月輝方丈二首

雞犬不聞音仙家巷陌深洞簫吹赤玉丹竈化黃金庭  
迴秋花寂堦寒夕雨沉願傳方外秘勿使歲華侵

秋林積雨晦晏坐失朝曛地似通勾漏人疑是少君依

依歸洞鶴冉冉度窓雲預恐重來日  
花源杳不分

雨中憇雙泉寺

野寺臨官路山門俯近郊  
閣虛鐘梵寂院靜薜蘿交  
密雨沉蛛網閒雲擁鶴巢  
故人詩在壁惆悵隔衡茅

壁間李子

題詩

十六日再至寺

十日重來此登臨興轉幽  
老僧烹石耳留客坐山頭  
陰洞生雲霧陽坡散馬牛  
翻嗟出城晚不值菊花秋

靜海寺

窈窕城連寺，巉岩石抱亭。  
洞虛雲氣白，厓斷草痕青。  
寶匣封宸翰，珠花絡藏經。  
迴翔不覺晚，歸馬傍春星。

倫上人院晚坐次白湖韻

過雨禪房寂，松筠一逕遮。  
梵筵青瑣珮，香竈碧山茶。  
鶴靜敲寒水，僧閒數落花。  
詩人類迂僻，乘興即為家。

九日登千佛山寺五首

南山空翠徠，野老倦登臨。  
城郭千年迹，雲霄萬里心。  
夕



陰涵積水風葉下長林短髮新來白黃花不可簪

亭午客先集憐予遲出城吏當青塔候僧下碧山迎奕  
譜傳新勢騷壇講舊盟洞泉秋不冷好共濯塵纓

石壁青含雨松臺迥入烟悶隨天上客閒訪洞中仙菊  
采芬芳葢詩留醕酖篇重逢倘萬一攜手話茲年

窈窈寺門敞蒼蒼山徑微風輕不落帽雲近忽凝衣背  
領丹楓直垂岩紫菊肥晚途喧葆吹輿醉出林霏

半巖風且急衝雨下山難醉後還騎馬狂來不正冠陰

陰南國暝淦淦暮秋寒預想茅簷際迎門稚子懽

十月六日遊千佛山寺

亭午登山寺淹留夕未歸涼風起高樹落葉滿僧衣城郭寒烟聚樓臺暮景微京華十年客愁絕賞心違

入寺

共邀黃鶴侶來問野狐禪日出山中寺風鳴樹裏泉落花空色相啼鳥伴幽玄莫叩輪迴事吾生自有緣

出寺

雞鳴春日曉鐘落上方幽樹濕雲猶住山空翠欲流酒  
床隨客去詩草付僧收虛羨岩栖子塵鑣不可留

壽孫萬戶母

歲歲稱觴處將軍此舊庭玉函開寵詔紗幔叩遺經徑  
茁宜男草簷垂婺女星白頭真入畫長對曉山青

壽程良用父

雅尚陶洪景風流顧辟疆名傳天北極家住水中央晚  
日明花宴春雲護草堂髯郎歸節美衣繡出明光

壽文孔暘

壽域開梁苑韶華逼艷辰月臨春館靜花簇夜筵新鶴  
信傳西母鸞蕭樂上賓轉憐多病客高枕獨懷人

何圖樵壽五月十五日

勝地三茅北嘉辰九夏中壽尊浮海月樵唱落天風席  
近紅榴艷庭深綠桂叢遙憐爛柯者仙籍會相通

題秦國聲為迺翁早牧壽卷二首

江門閒起坐白髮照秋山花擁宜人珮蘭分稚子班天

恩來鎖闥星信報銀灣笑看東林鶴傳書海上還  
池館山中舊風光畫裏新澗松同雨露江草自冬春犬  
吠當林塢花明隔水濱遙疑姓秦者莫是武陵人

壽康對山母

垂柳陰香車西園春雨餘壽多從入老身健欲凌虛紫  
鳳雲中誥青鸞海上書近臣兼色養何必賦閒居

壽高給事廼翁

老境真熙洽山中白日長鶴巢松樹古花近壽筵香几

杖榮朝典謳歌樂歲康郎君青瑣貴歸路滿恩光

輓無錫吳翁

錫山春日墓聞說  
葵鄉賢露葉迷  
蒿里風笳慘木田名  
高懸榻後事定  
蓋棺前隴上  
清明月年年哭杜鵑

王憲司挽章

桓典聲名久相如  
詞賦稀世方  
驄馬避身已茂陵  
歸白露凋原草  
流塵集總幃  
傷心庭下鶴時向月中飛

楊介夫喪母

楚客抱沉哀孤舟天際回  
恩餘五鼎食人閒九泉臺  
古壁機絲斷殘燈總帳開  
慈魂猶戀子夜夜夢中來

輓董天粹母

板輿遊樂地經晉復經燕  
豈料言歸日翻成永別年  
堂虛春草合機冷夜燈懸  
欲問三遷事慈容隔九泉

輓謝都憲二首

太守驅車日中丞擁節年  
化行江郡美名在蜀人傳  
漆吏悲移壑殷王惜濟川  
隴門雙石表何處立秋烟

人間七十載地下幾千秋無復青山到真同逝水流亂  
雲籠閣迥啼鳥殯宮幽欲采蘋花奠閩江遠帝州

輓張思紹乃翁

歸老身猶健游仙夢已侵鹽司官譽在豸服主恩深迢  
遞碧山路淒涼嘉樹陰秋風渡瀘水客子正愁心

劉惟馨二親哀冊二首

徂謝感流光悲涼十四霜篋中無諫草身後有封章遺  
曲傳巴里清風滿蜀鄉鳳凰原上木愁色日蒼蒼



相如駟馬榮毛義悅親情詎料終天別惟爭一日程機  
堂總帷捲隧戶漆燈明欲識歸人恨江猿夜夜聲

輓海釣翁

山海關頭月春來幾度圓杖藜無起日華表有歸年寂  
歷遠遊道淒涼孤憤篇朱雲不可見留檻漢庭前

蕭醫士挽詞

術妙軒岐上年垂耄耋間烟霞成癖性松栢是容顏濟  
物心常在游仙夢不還錢塘江口月長照玉泉山

輓王憲副父母二首

露白秋郊迥風高宰木淒深嗟墓門道猶有聘君題  
跡龐公並詩名魏野齊孝魂招不返應只在遼西

白首來官舍丹旌返舊山有懷空色養無日見生還  
暮草春回碧機堂晝掩闕天涯有遊子腸斷舞衣斑

題王臣指揮母挽冊

將軍懷母處堂屋對南山香斷翟瑜冷機空絡緯聞  
暮花愁裏色春酒夢中顏一掬長淮淚隨波去不還

輓同年程御史良用次見素韻二首

有志經邦國無憂及子孫  
淒涼柱下史慷慨殿中言  
髮已生離白聲還死別吞  
空山一杯酒何日奠忠魂

新安新廟起聞子入鄉賢  
古墓青山外秋風老淚前  
乾坤英爽聚日月大名懸  
誰續少陵語載歌驄馬篇

哭兒羽

阿羽生存日人呼聖小兒  
虛疑渥洼種實有鳳麟姿  
學步先遵禮能言即賦詩  
悼渠憐子夏休訝入官遲

湖上憶亡兒羽

往歲春湖曲嘗携稚子遊花迎玉膚笑雲傍綠衣流隔  
水時穿竹看魚數探舟傷心獨來日烟月暮含愁

登王文墓

磊落王夫子消沉歲月深墓田餘數柳書屋有孤琴掛  
劍千秋恨通家百世心暮山荒草際登拜一沾襟

亡弟賦改塋述哀

塋汝已六載那期重撫棺壯心原不死遺骨久應寒石

室靈儀在銘旌粉字殘一為同氣感雙涕夕汎瀾

上王氏妹墓

王郎呼不起吾妹亦泉臺白日山頭下悲風樹裏來有  
親差可慰無子更堪哀歲歲荒墳土何人奠一杯

仲冬望日先隴述哀

砢砢銜石鳥悵悵棲月烏雲霄雙翼倦天地此身孤雪  
野兼愁遠風楊著淚枯一杯殘臘酒知到九原無

東村暮歸經羅侍御墓緬懷知舊惻然興哀兼

呈同志二首

雲日蒼茫合東郊暮雪時古臺斜落影青嶂迥含安澤  
靜龍蛇遠山寒鴈驚飢親交半丘墓愁誦七哀詩  
野色擁歸軒遙遙登古原田烏啄素雪山烏下黃昏近  
郭寒收市荒祠靜掩門吾行有佳賞思與故人論

過王履軒墓

鬱鬱將軍墓蒼蒼松檜林斷猿千古夢歸鶴九原心地  
勝河流抱門閒草色侵承家有兒子文史富纓簪

幽寂

幽寂卧蓬戶淒涼懷舊吟鶯啼非故國草色亂春心落  
日黃雲暮陰風碧海深嗷嗷北來鴈二月有歸音

對月感懷

惆悵東籬下西風酒一壺物隨秋漸老人與月同孤幻  
夢疑蕉鹿塵踪笑網蛛寒蛩不解意唧唧嚮青蕪

送王廷珍分教東明

春日東明去西齋教鐸分羣隨鄭老座經授伏生文水

暖魚騰藻泥融燕啄芹有懷如我及看雨賦停雲

方獻夫讀書山寺

聞君讀書處孤榻寄禪林日抱左氏癖時為梁甫吟  
開窓千嶂出隔巷一燈深獨有花龕月盈盈鑑苦心

雨宿姚村二首

舊隴東城外新墳更在東川原相近接靈輿合潛通碧  
草生秋石青楊裊夜風茂陵山下路來往恨無窮

野逕來人絕村居夜寂寥牖燈方閃閃庭雨更瀟瀟墓



土空親築精魂不可招百年孤子恨天地與同銷

聞三平菊酒初熟詩以調之

愛酒苦無酒避狂翻蹈狂聞君新釀熟色勝菊花黃  
月夜樓陰靜霜天海氣涼何當騎馬去飽挹甕頭香

故山道中二首

此山青可愛岩嶂繞雲松暫息野中駕彌眺塵外蹤  
石橋今古在香客往來逢落日谷風起依稀聞暝鐘

素蓋凌風轉飄飄度石梁田家始晡食村店已斜陽紅

憶山椒熟青憐隴麥長郊行亦何事能遣世情忘

辛巳元日止酒

草閣逢元日悠悠一病身碧山虛對雪青柳自含春罷  
接屠蘇盞長拋漉酒巾相過見漁父應笑獨醒人

望雨

倚杖柴門底雲峰引興長  
驗霞從曙色瞻雨過昏黃柱  
礎虛含潤盆荷實抱香  
空簷百尺溜何日聽浪浪

憂旱二首

欲叩蒼天意悠悠默且玄樹焦真可爨井渴故須穿碧  
漢空秋水鍾山靜曉烟九重寬卹詔何日下荒田

亢陽厚土裂茲事莫言無旱猗久為恠情龍真惱吾未  
沾三伏雨敢說九秋租珍重雲霓望蒼生待一蘇

坐雨

密雲蒸短夜繁雨下清朝不救中田麥猶沾晚歲苗度  
窻纔浙浙浮檻更蕭蕭咫尺蘇端舍衝泥未可招

八日喜晴

海門晴日吐春水坐來添喜入三農望豐歸五穀占野  
鶯啼秀木江草映虛簾我病生嫌酒深杯且一沾

過北川周子莊

借問平陽守泉莊今若何樹稀鳴鳥散花亂早蜂多酒  
埵封苔蘚漁簪冒薜蘿淒涼世交子忍淚一相過

正月十七日先大人壽辰

此日吾親壽常年樂事多夜堂歌窈窕春綠戲婆婆永  
恨重泉隔深驚六載過風前酌卮酒腸斷楚川波

過王生廬墓

赤日東郊午言過孝子廬草衣惟短杖土屋有藏書蛛  
網苔侵戶蝸牆雨溜渠閔祠看咫尺比德定何如

問信

問信陳州盜將軍有捷書真成机上肉豈慮釜中魚殺  
氣東連賴烽烟北近徐招招淮口檝將發故躊躇

盜賊

盜賊還奔突傳聞過白洋關河苦迢遞雲月復蒼茫賈

客回江舸居人競野航雞鳴戒同伴或恐犯垂堂

過姚村舊業村有先君子遺隴

里巷紛仍在鄰翁半不存午雞喧井落寒犬卧衡門側  
宇天光入魏阡霧色昏百年桑梓地回首一傷魂

忽報二首

忽報楊開府新傳羽檄過未湏憂赤縣且復守黃河去  
馬定看疾來舟遂不多飄蓬愧生理終日傍干戈

豈料朝天使翻為避地人去留難與決傳報恐非真碧

樹花爭盡清江水自春廟堂嘉靖日州郡轉風塵

龍洞山雜咏二首

寺繞層峯入溪通曲澗開八年千里夢七日雨迴來古  
壁流烟色荒蹊疊草萊登高賦搖落慚愧宋生才  
出郭始朝飯入山聞暝鐘自憐衰病久敢恨僕夫慵立  
馬看羣岫開尊對兩松誰能回白日眼眺且從容

丁字口北

海口潮初落片帆秋正堪斜陽飛鳥度微雨斷雲含戀

關心馳北留人風自南一聲漁笛響鳬鴈起江潭

鄂渚

鄂渚維舟楫登高覽洞庭地連秋水白天入暮山青望  
闕瞻星斗懷人感鵲鴒漁簫向夕起鳴咽不堪聽

暮行

野色蒼茫合宵征問路頻馬蹄經蘚滑螢火度溪新鄉  
國今何許家書動隔春遠村燈燭處簫鼓賽田神

逐客



逐客去已遠相思空爾哀  
不聞宣室召徒抱賈生才  
野竹侵書幔山鶯進酒盃  
梁園親識滿今雨幾人來

野風

野風吹荻葦寂寂楚江秋  
水氣寒侵幌濤聲夜撼舟  
古今雙社鳥天地一沙鷗  
欲作懷湘賦官程不可留

泛江

汎舟成小酌半醉倚篷窗  
烽火偏西接關山直北寒  
渚花春漠漠江日暮團團  
誰識荆南守思鄉欲掛冠

歸自北村

款款野中話依依川上情  
雨昏沙徑色風起暮林聲  
臨水僕夫望呼予童子名  
柴門露遠火迴策興彌清

過北渚莊二首

野店長渠繞郊扉晝不開  
茅堂蔭榆柳沙路上莓苔白  
鳥晴飛疾玄禪夕奏哀  
主人城市裏經歲幾曾來  
渚老有高趣未衰先棄官  
心猶壯夫勇身且布衣  
寒雪裏中宵坐燈前細字者  
不知東海上何日起垂竿

再過北川別業

負郭稻千頃青青遙入雲  
兒孫不解守賓客自爭分  
剗曲舟慵泛山陽笛忍聞  
傷心碧堤柳猶映白鷗羣

題白泉王子壁

吟興復不淺村中無酒家  
團雲深映竹墟日半籠花  
石柵啼黃鳥溪泉擁白沙  
晝眠兼夕坐非為惜年華

卜山居成有作

久定華山約今來始卜居  
夢遊曾屢到心賞復何如  
團

巷環高柳淵泉抱古墟從茲簪與綬當有絕交書

過湘王故宮

舊日湘王府淒涼百歲多堞荒秋薺上樓殿夕雲過廢  
園穿狐兔深宮散綺羅同行有詞客閒詠黍離歌

過故山人園

園園碧山隅山人此舊居豪華非往昔冥漠意何如古  
木巢寒鳥殘陽隱廢墟傷心醉遊處猶有壁間書

家豢鸚鵡為狸奴所斃予傷之賦短律二篇書

呈同志期有以慰我也

爾本能言鳥羈栖誤此生衆方憐彩翠天苦忌聰明月  
下離羣思花間喚婢聲居然成往迹留架在前楹

轉架藏身捷臨窓命食嬌愁來真可掬魂去竟難招露  
井流音寂風堦落羽飄醉翁元好寢為爾立清宵

石橋驛南觀漲

夜雨山水發奔濤盈澗流石梁嗟已斷何處覓方舟永  
路緣朱坂餘暉映綠疇登高西北望隱隱見昭丘

由魚料驛登岸赴荆門

驅馬麗陽界荆門途不賒  
平田飛野雉積水亂鳴蛙  
日下西山暝江懸北斗斜  
荒村逢故老停蓋問桑麻

自漢江泛舟過宜城遇風雨大作

短棹驚洪河川行憂畏多  
轉憐時役苦無奈旅程何  
霧黑江龍閫雲腥岸虎過  
黃昏投古驛從此順風波

自峴山趨赴襄城不及門遂宿漢江驛

黃昏峴山曲征馬倦躋攀  
雨過蒼林外蟲鳴廢井間  
斷

崖成聚落深巷隔塵寰古驛懸燈候重門未上關

登仲宣樓次韻陳矩菴中丞

宕宕南郡樓到郡此重遊島沒雲中樹天浮海上漚旌旗連戍色鼓角動邊愁萬里看西北蒼茫見帝州

江郡敞雲樓東南據上遊日華浮野雪霞彩散川漚俯仰悲千古登臨起四愁王師神且武何日靖西州

答西橋大復二君

丙子之歲客遊兩河辱劉何二君聯句惠寄

庚辰仲春屏煩抱痾林居值雨檢覲前翰悵  
焉起懷步韻二章爰申情抱云爾鳳禪音旨

豈曰同哉

憶在中州日曾傳上苑歌暮雲千里隔春草四年過漢  
殿仍金馬秦關且玉珂報章慚獨晚才力謝羊何  
懶性真成癖哀吟不當歌田園自開闢城市少經過雨  
卧山迴枕春行柳拂珂馬周頭漸白無日見常何

贈劉介夫舉人歸金鄉限韻作




雲日晝冥冥幽人過草亭客衣寒映水歸騎晚侵星雨  
外山逾秀霜前柳正青醉翁多晏起行李暫須停

疊美字韻再別承菴

釣魚特作羹載酒出山城曉雨陽關恨春風故國情登  
臺悵予獨戲彩羨君行恐聽碧林外蕭蕭歸馬鳴

送客

知君意不淺近送獨綢繆文字真吾契河山且故州水  
雲虛映日風樹碧含秋嶽頂傳詩在誰將片石流



華泉集卷四